

Garaî É Hkyô Mhô-Myi Shindâm Pé



Zaiwâ

Laiká bùk saí sù : Chùmlùt Ban Roí
Hí saí htoq é buì-nyì : March, 2004
Dum saí htoq é buì-nyì : October, 2006
Dum saí htoq é buì-nyì : May, 2020
Myíng : Zaiwâ

Author : Chumlut Ban Roi
First edition : March, 2004
Second edition : October, 2006
Third edition : May, 2020
Language : Zaiwa


Nghapcham	Bo é dang-u pé	laiká myòq
1	Mau hpân nàp mai, sumlhó dowuî tîng é jé shoq	1
2	Jùn dut nyi é Isira-elaq byu pé Moshèq shuî lùt htoq lo é hkyô	12
3	Ge é Samariq byù ra yùq	26
4	Byùq byùq é yùqzo lé, dangké yu é hkyô	34

Dang Hi Hpóng

Laiká bùk shî gi, mhô-myi zo pé lé, kê tô é nghut lhê. Laiká sâng-hi nghap mhoq bang eq sê nghap bê bang le je sê nghap lò râ matú, sâ htoq tô é nghut lhê. Rawuí gú gi, jongzô pé nyí wuî nyí lêng nyo nyi é myíng pé lé jai chung tô lhê. Rawuí gú gi, zaiwâ lhúnglhang bang jai chung nyi é myíngdang pé lé jai chung tô lhê. Haû mù, laiká bùk shí mai ó le nyo nyi é dang pé wó mhoq yu râ htoq agó, luì za wó sé mù rè rè wó nghap râ matú nghut lhê. Laiká sâng-hi mhoq yu é zoshâng wuî le, danghtê dang lichyúm pé lé wó lhoq htoq yù mù, dangjí danghkun bànshoq lé wó matsîng yù râ matú nghut lhê. Mhô-myi shí pé bànshoq lé ban nghap jáng, danghkun dangbun pé lé, je wó nghap râ matú myít myòq byù lû kê tô é nghut lhê.


Mau Hpân Nàp Mai, Sumlhó Dowuî Tîng

É Jé Shoq




A-Nham Sông-Hi Lhê É Hkyô

A-nham sông-hi má, Garai Gasang gi, mauhkông
eq myigùng lé hpan to lûi, bui, kyî, lha-mó pé lé le,
hpan tô ri. Hau htâng duì myíduì, yùq myíyùq, nyì
myí-nyì lhúnglhang lé hpan to mù, waxâng Adam gâ é
yùqzo lé le hpan tô ri.



Adam, htuqbáng byù rô é hkyô

Adam gi, Garai Gasâng é Edin hkyâm má, gau-nyaú pé eq rahá yhang baú nyi tô ri. Haû mô, yhang gi, yhang eq pung é lazúm rayùq rô nyi ri. Hau é yánmai, Garai Gasang gi, myiwe zo rayùq hpân byi ri. Garai Gasang gi myiwe zo haú lé, Éwaq ga myhíng byi ri.



Ge É Mai, A Gè Dùt Byùq É Hkyô

Tsadán gi, Garai Gasang é gyè nghut ri. Yhang gi, lhângmuì eq pung é nghut luì, agè ashop sù nghut ri. Lhângmuì haû gi, Adam eq Éwaq lé, ê gúnglaú ri.

Adam eq Éwaq gi, Garai Gasang hkâ zo gâ é shi lé, zo bekô nghut ri. Haû mù, Garai Gasang gi, Yhángnhik lé, nguì ngón é Edin hkyâm hkaû mai, kôn htoq pyám bê nghut ri.



Wuê Hkê É Asàk Duì Hkyô

Garai Gasâng é hkyâmshing gan mâ é asàk duì hkyô gi, wuê hke jamjau hkyô chyat nghut ri. Adam eq Éwaq nhik gi, hkâsu kut asàk wó xoq duì kô râ lhú?


Asàk gi, wó duì kô râ nghut lhê; nghut kôlhang, yháng nhik gi, Garai Gasâng é dang lé a gyo kô é yánmai, Garai Gasang eq rahá wó zûm yàp kô râ a nghut lo.



Garai É Dang A Gyò Jáng, Mara Wó É Hkyô


Nga-nhúng gi, Garai Gasâng é dang a gyo luî, yubàk mara wó bê. Garai gi, yubàk mara lé chaq ri; nghut kôlhang, byu pé lé kúm gi, chyitdàp ri.

Yubàk mara gi, byu pê é ahtoq má byíng zan nyi ri. Haû mù, Garai Gasang gi, Mingkan gón lé lhoq htên pyám ra bê nghut ri. Haû gi, yhang hpan tô é byù lé hkyiyu naù mô nghut lhê. Nghut kôlhang, haû gi hkâsu wó dùt lo râ l hú? Nàng haú hkyô lé sé naû jáng, Nóaq é mô-myi lé nghap wú aq.



Nó-aq Lé, Wuì Sanghpo Saí Nhang É Hkyô

Nó-aq gi, Garai Gasang lé chyitdàp é sù nghut ri. Garai gi, Nó-aq lé, kô dîk é wuì sanghpo ralhum saí nhang ri. Wuì sanghpo haû gi, Garai Gasâng é dang lé gyo bang bànshoq eq gau-nyhaú lhúnglháng lé wó hkyiyù râ matú nghut ri. Nó-aq gi, byu pé lé, sanghpo hkaû má wàng sháng ga lung ri. Nghut kôhang yhángmòq gi, a kâm wàng kó nghut ri. Hau htoq agó, yhángmòq gi, Nó-aq lé le, Garai Gasang lé le, wuìzuì shèq kut pyám byî akô nghut ri.



Hkyi Yu É Hui Bang Gi, Shaû Ri

Ra-nyí lé, Nó-aq gi, yhang myi, yhangzo sum yuq eq yhang du-mó pé sum yuq le kut mù, wuì sanghpo hkaû má wang ló bekô nghut ri. Gau-nyhaú a-myû chângjùp le châng wang ló bekô nghut ri.

Hau htâng, mauhkûng mai gi, mau mó wo gyó lò mù, myigûng mai gi, wuì búm mó bùq htoq lo ri. Mau haû gi, myi xê nyí myi xê myîn jé shoq a hkyîng é za wo nyi ri. Byù gó bang gi, wuì sanghpo hkaû má wang râ matú, htâng gyó byùq bekô nghut ri.


Mingkan gón dowûi dîng byùq bê. Shinggan má nyi é byù lhúnglháng bang gi, dowûi má myùp shi byùq bekô nghut ri. Myhang dik htûm é bùm lháng gi, wuì hkaû má myùp byùq bê nghut ri.



Wòqqan Síng-Yang Tô To Byî É Hkyô

Dowuî dǐng é razàn myáng é htâng, mingkan htoq mâ é dowuî gi, kân byùq bê nghut ri. Ahkuî, yhángmòq gi, wuì Sanghpo hkaû mai wó htoq lô kômû, hí lhê é eq ra jung za, asàk wó duî bekô nghut ri. Nó-aq gi, yhang eq yhâng yhûm byù wuî hkyiyù hui bê yánmai, Garai lé jeju hkya-ôn ri.

Garai Gasang gi, dowuî tǐng luî mingkan lé hkâ-nhám le, dum a lhoq hten râ sàksé dōng, wòqqan síng-yang lé, mauhkûng má tô to byi bê nghut ri.



Jùn Dút Nyi É Isira-elaq Byù Pé Lé, Moshèq Shuî Lùt Htoq Lo É Hkyô



Nyheq nú Moshèq

Isira-elaq byù pé gi, Egutuq ming má zànwut myo myo jùn dút nyi kô é nghut lhê. Haú u lé, Moshèq hku lé bê nghut ri.

Egutuq Hkóhkâm gi, Isira-elaq byù pé lûm myô jàt lò mù, yhángmòq lé ûng zô lò râ lé, myît chiq nyi ri. Haû mù, yhang gi, hku lé lo é Isira-elaq yùqzo nyheq nú hkangmó lé sat pyám râ matú, hkun-mó hkyô tô ri.

Moshèq é yhângnu eq yhângwâ nhik gi, yhang lé, dò zo má haq kat mù, wuìlàng má myû byóm nhang tô ri. Dò zo haú le, hkóhkâm é byìzo myàng mù, nyheq nú Moshèq lé xe yù lûi yhangzo kut baú yu ri. Haû mù, Moshèq gi, hkóhkâm wâng má, nyi kô lò bê nghut ri.

Moshèq eq myi nyé nyi é zu púng

Moshèq gi, yhang Isira-elaq byù myû rayùq nghut nyi é lé, kô lò jáng shèq sê ri. Rà-nyí lé, Moshèq gi, jùn dùt nyi é Isira-elaq byù ra-yuq lé, Eguduq byù ra-yùq èq nhuq bàt nyi é lé, ê myang ri. Haû mù, yhang gi, yhûmsing byù lé garúm yû nau é yánmai, Egutuq byù haú yùq lé sat pyâm bê nghut ri.



Haú é yánmai, Moshèq gi, Hkóhkâm wâng mai yòso shut hpang e ló bê nghut ri. Yòso haú má nyi tô é hkûn, zu púng hkaû mai, Garai Gasang gi, “Nàng, Egutuq hkóhkâm chyáng taû ló mô, ngá é byù pé lé nhang kat àq nghû, ló taí aq” ga, yhang lé taí ri.

Hkóhkâm Chyáng, Moshèq Taû Lô É Hkyô




Moshèq gi, a wám taû lô é nghut kôlhang, Garai Gasang é dang lé gyo bê nghut ri. Hkóhkâm hpó gi, Isira-elaq byù pé lé a kâm nhang kat mù, Garai Gasang gi, yhang lé, maúhpo a jung jung kut shit ri.

Nghut kolhang, yhang gi, a gyo byi nghut ri. Haû mù, Garai Gasang gi, “Egutug byu pê é yùqzo zo-mún bànshoq lé, ngò sat pyám râ” ga taî ri.

Sau zô é sui

Hau htâng má, Garai Gasang gi, “Núngmòq é sau zo lé sat mù, sui lé, hkúm dong má bùt lhû to keq, sui haû gi, nungmòq lé hkyi yù râ nghut lhê” ga, Isira-elaq byù pê chyáng, Moshèq lé ló taî kyo nhang ri.



Byù sat maúmang gi, sui dàp tô é yhûm pé lé lhaî pyâm to mù, sui a dàp é yhûm bànshoq má wang ri. Hkohkâm yhûm mâ é yùqzo zomún le, sat pyâm é hui bê nghut ri. Hau htâng má, hkohkâm hpó gi, hkâsu a dàt kut lo mù, Isira-elaq byù pé lé htoq ló nhâng bê nghut ri.

Nhông Nè laî byìt é hkyô

Móshèq gi, Isira-elaq byù pé lé, Egutuq ming mai shuî htoq lò bê nghut ri. Hau htâng hkâ myáng a myáng má, hkohkâm hpó gi, Isira-elaq byù pé lé ê dum taû chyup yù râ matú, yhâng é gyèwap mó pé lé châng nhang kat ri.



Isira-elaq byù pé gi, nhông nè má ê jé kô é hkûn, a wó laî dâp dùt bekô nghut ri. Nghut kôlhang, Garai Gasang gi, yhángmòq lé, nhông haú má hkyô mó hpóng byi luî, Isira-elaq byu pé gi, kyuq huî é myigùng mai wó laî byit ló bekô nghut ri.

Egutuq gyè pé gi, yhángmòq lé châng hkat nyi kô e hkûn, hkyô haû gi, wuì dum byíng lô mù, wuì hkaû má myùp shi byùq bekô nghut ri.



Garai Gasang Byî É Zoshuq

Moshèq gi, byù pé lé yoso mai shuî lâi lô ri. Haú hkûn, Garai Gasang gi, yhángmòq lé, lùqgòk mai wuì lhoq htoq byî é htoq agó, yhángmoq sho wó zo râ matú, nghoq pé lé, yhángmòq nyi jang má dâng gyó lé nhang ri.

Yhángmòq gi, yoso má myi xê zàn yhang nyi myáng byuq kô é nghut kôlhang, yhángmòq é mèbu eq hkyî-tsung gi, a wôm byuq nghut ri. Buì-nyì haú pé má, Garai Gasang gi, yhángmòq râ é jung hkangmó lé garúm byî nyi ri.

Jèp É Tarâ Mó Raxê Wó Yu É Hkyô

Isira-elaq byù pé gi, Sínaq bûm má jé ló kô é hkûn,
Garai Gasang gi, Moshèq lé, bumgùng má wùt yù luî,
jèp é tarâ mo raxê lé, lùq long má ká mù, byî kat ri.

Haû jèp é tarâ mó raxê gi, ge é nghut kolhang,
Isira-elaq byu pé gi, a wó cháng kó nghut ri. Byu pé gi,
Garai Gasàng é tarâ lé a châng é za, yhûmsîng ô nau é
dông za kut bum akô nghut ri.



Sik-yang htoq mâ é lhângmuì

Isira-elaq byù pé gi, Garai Gasang lé, mara hun é đông tái pùt nyi akô nghut ri. Yhángmòq gi, Garai lé, gè gè yhang a lùm kó nghut ri. Haû mù, Garai Gasang gi, yhángmòq lé, a-num num dàm byi ri. Nghut kôlhang, hkyi yù hkyô gi, yhang é dang gyò bâng é matú, hka-nhám le, hpông to byi ri. Radàm lé, Garai Gasang gi, yhángmòq nyi é jang má lhângmuì nhang kat é đông, yhángmòq lé dàm byi ri.

Haû mù, Moshèq gi, Garai Gasang chyáng kyûdung jáng, Garai Gasang gi, “Lhângmuì lhô ralhum saí mù, sik-yang èq tu shap to aq. Lhângmuì htê é hui sô ó yùq nghut kôlhang, lhângmuì haú lé tu wú jáng, wó byûn sháng gàq” ga, Moshèq lé tái ri.



Ge É Samariq Byù Rayùq



Hí hpyang, Yesuq mungdang hko kyô nyi é hkûn, chyúm mungdang sê é byù rayuq gi, toq yàp mù, “Yhûmsîng ê, ahtum abyùq é asàk wó râ matú, ngò hái kut ra râ lhú?” ga luî, yhang lé chyam wú é dông myî kat ri.

Haú hkûn, Yesuq gi, “Jèp é tarâ má hkâsu ga kê tô rilhú? Nàng haú lé hkâsu sê gyô ri lhú?” ga taû myi jáng, “Náng é yhûmsîng Garai lé, i-myît nhiklhum bànsheq èq chyitdàp àq. Nàng eq sêng é sê lé, yhûmsîng gùng eq rajûng za chyitdàp àq, ga bo tô ri” ga dum tû taî ri.


Haû jáng, Yesuq gi, “Nàng taî é jô ri haú dông kut jáng asàk wó yù râ nghut lhê.” ga, tû taî ri.

Haú hkûn, yhang gi, “ó yùq gi, ngò eq séng é sù nghut lhê l hú?” ga luî, mara a bò sù su ga, Yesuq lé taî kat ri. Haú hkûn, Yesuq dangké dông taî é gi, “Byù ra-yùq, Yeruqsalem mai Yerihkó wà shut e ló é hkûn, da-myàq eq htûng huî ri.

Da-myàq haú bang gi, haú yùq lé mèbu hkyut shang pyám byi mù, dàmhkô dòng shoq nhuq bàt luî, alùq shoî shî jáng shèq tô pyâm to kô mù, ló byùq bekô nghut ri.



Hkyangjong agyî rayùq gi, haú hkyô mai laî ló é hkûn, haú yùq lé myang kat jáng koi laî ló byùq bê nghut ri. Haû eq rajung za, Lewiq byù rayùq le, haú jowò má jé jáng, é wú mù, koi laî ló bê nghut ri.



Haú htâng, Samariq byù rayùq le, haú hkyô mai lâi
 ló é hkûn, no lèq tô é byù haú yùq lé myàng jáng, wú
 shogyo mù, yhâng chyáng huî ê luî, dàm pé má, xû eq
 tsâ-byiq wîng hut gyun luî, pánchoq eq htup to byî ri.



Haú htâng, loze htoq má htô chûng mù, bíng yhûm ralhum má shuí ló luî, chi ló gai byî ri. Htang nàpkyó, yhang gi, bíng yhûmsîng hpó lé denari í chap byi mù, “Shí yùq lé bo wú gòn lajang byi laq, ngò dum jé lò jáng, nàng gyó âng é myhó lo byi râ.” ga ri.

Shí hkyô lé gyô le, nàng hkâsu wó myît rilhú? Byù haú bang sum yuq mâ é hká yùq gi, da-myàq hui sù eq sêng ri lhú?” ga tâi ri.

Haú hkûn, chyúm mungdang sé sù haú yùq gi, “Da-myàq pê èq nhuq bàt é hui sù eq sêng é gi, yhang lé shogyô é sù nghut ri.” ga tû táí jáng, Yesuq gi, “Nàng le, haú yùq kut é su ló kut àq.” ga tâi ri.



Byùq Byùq É Yùqzo Lé, Dangké Yu É Hkyô



Byù rayùq gi, yùqzo í yùq wó ri. Ra-nyí má, yùqzo tiq sù gi, yhâng wa lé, “Âwa ê, ngò wó yù âng é muìzè lé, ngo lé gâm byi laq.” ga dưng ri. Haú hkûn, yhângwa gi, yhangzô nhik lé muìzè gâm byi bê nghut ri.



Haû mù, tiq sù yùq gi, yhang é muizè pé lé ûng pyám luí, wó é ngùn lé yu chûng mô, yhum mai htoq ló bê nghut ri. Yhang gi, gyai wê é ming shut ê mù, mingkan ngón hkyô má, yhang é ngùnzè pé lé langsâ pyám bê nghut ri. Yhang wó é ngùnzè ban byùq é u lé, haú mau má mùt mó gyó mô, yhang zò-mut wuì shit hui bê nghut ri. Haû mù luí, yhang gi, haú mau mâ é byù ra-yùq chyáng, wàq tso langchyáng ê kut ri.




Nghut kôhang, yhang lé, zô jung ó a byi zo kó nghut ri. Haû mù, yhang gi, zò lûm mùt luí, wàq pé zô é nùqkyuî pé lé lhang, zô nau lò bê nghut ri.



Haú hkûn, yhang gi, nûngngham wó mù, “Ngá wâ chyang mú zuî é bang gi, gyi shoq myàng zô lhê; ahkuî, ngò gi, zò mut huî nyi ri. ngá wâ chyang ló mô, “Âwa ê, ngò gi, Garai lé le, nang lé le shut bê haû mù, ngò gi, nung zo kut râ a gíng lo, ngo lé jun ra-yùq đông za shèq, hâp yù laq nghû, ló tôngbán râ” ga, yhangwâ chyang dum taû ló bê nghut ri. Yhangwa gi, yhangzo lo é lé, we mai lhom myang kat jáng, wú shogyô é i-myít èq din ê mô, bopuq ê puq ri.



Haú hkûn yhangzo gi, “Âwa ê, ngò gi, Garai lé le, nang lé le shut bê, haû mù, ngò gi, nung zo kut râ a gíng lo, ngo lé jùn ra-yùq dông za shèq, hàp yù laq.” ga, tôngbán ri.



Yhângwa kúm gi, duì nhâng zoshâng wuì lé, “Réng dik é mèbu lé, hân yu lé mù hut byi keq, lòqtsung le tsung byi keq, hkyî-tsung le tsung byi keq, xu myum é nojûng lé sat mô, poî kut byi sháng. Hâi mù gâ le, ngá zo shí yùq gi, hí hkûn shî bê nghut kôhang, ahkuî dum duì bê, byùq byùq bê nghut kôhang, ahkuî dum myàng bê.” ga tâi ri.



Haû mù, yhángmòq gi, zo poî shuq poî kut luî, chôrnón nyi akô. Haú u lé, yhang mang gi, yohtung pá má nyi tô ri.

Yhang, yhûm má jé lo é hkûn, zìng ut bàt mô, nón nyi bùm kô é lé, ló myâng luî, duì nhâng zoshâng rayùq lé “Hâi kut nyi akô.” ga, myi jáng, haú yùq gi, “Yhûmsîng

ê, nunggu dum jé lô luî, náng wa gi, xu myum énojông
lé sat mô, pôi kut byi nyi ri.” ga, taî kyô ri.

Yhang mang gi, nhik mó gyô yo mô, yhumhkaû a
wang lô é za, mhat nyi ri. Haû mù, yhangwa htoq lé mô,
lé chyua ri. Nghut kôhang yhang gi, “Ru wú aq âwa,
ngò gi, zàn wut myo myo, náng dang gyo mù nyi nyi
kôhang, luzúm wuî eq ngón kún râ matú, bairâm radu
za lhang a sat zo nhang wú é nghut lhê, nghut kôhang,
náng é ngûnzè lé, mingkan ngón hkyô má langsâ pyâm
byi sô lé gi, xu myum énojông lé sat byi ri nhung.” ga,
taî ri.



Haú hkûn, yhângwa gi, “Ngá zo é, nàng gi, ngò eq
hkâ-nhám le rahá nyi nyi sù nghut lhê, ngá é sutzè
lhúnglhang gi, náng é chyat nghut lhê nghut kôlhang,
nung gu gi, hí hkûn shî bê nghut kôlhang, ahkuî dum duì
bê, byùq byùq bê nghut kôlhang, ahkuî dum myàng bê.
Haû mù, gabú myit èq ngón poî kut byî é nghut lhê.” ga
tâi ri.

